

Guru mengaku tidak bersalah lakukan amang seksual fizikal terhadap pelajar

KUCHING: Seorang guru lelaki mengaku tidak bersalah apabila didakwa di Mahkamah Sesyen di sini, semalam atas dua tuduhan melakukan amang seksual fizikal terhadap pelajar lelaki berusia 15 tahun.

Tertuduh yang berusia 37 tahun itu membuat pengakuan terbabit selepas kedua-dua pertuduhan dibacakan terhadapnya di hadapan Hakim Noorhisham Mohd Jaafar.

Mengikut pertuduhan, tertuduh didakwa melakukan kesalahan berkenaan dalam dua kejadian berasingan masing-masing pada Oktober dan 10 Disember 2025, kedua-duanya sekitar jam 10 malam di bilik warden asrama di sebuah sekolah di Petra Jaya, di sini.

Pertuduhan dibuat mengikut Seksyen 14(a) Akta Kesalahan-Kesalahan Seksual Terhadap Kanak-Kanak (SOACA) 2017 dan dibaca bersama Seksyen 16 Akta sama yang membawa hukuman penjara tidak melebihi 20 tahun dan boleh disebat, jika sabit kesalahan.

Timbalan Pendakwa Raya Chuah Kai Sheng tidak menawarkan sebarang jaminan terhadap tertuduh dan menyatakan kesalahan yang dilakukan adalah kesalahan tidak boleh diikat jamin.

Menurut Chuah, sekiranya mahkamah membenarkan tertuduh diikat jamin, pihak pendakwaan memohon agar jumlah jaminan ditetapkan sebanyak RM20,000 (didepositkan) berserta dua orang penjamin tempatan dan beberapa syarat tambahan.

Guru mengaku tidak bersalah lakukan amang seksual fizikal terhadap pelajar

► Dari Muka 1

Peguam Simon Siah yang mewakili tertuduh memohon mahkamah memberikan jaminan terhadap anak guamnya atas alasan tertuduh kini di bawah penempatan sementara di pejabat pendidikan daerah dan dikehendaki hadir bekerja setiap hari seperti mana-mana penjawat awam.

Sehubungan itu katanya, tiada sebarang kemungkinan tertuduh akan melarikan diri.

Hakim Noorhisham Mohd

Jaafar menetapkan tertuduh untuk diberikan ikat jamin RM10,000 tidak didepositkan dengan dua penjamin tempatan, selain menetapkan 16 Februari 2026 untuk pengurusan kes.

Selain itu, Noorhisham juga menetapkan tertuduh untuk melapor diri ke balai polis berdekatan sebulan sekali serta melarang tertuduh mendekati, menghubungi atau mengganggu mana-mana saksi pendakwaan, termasuk mangsa dan ahli keluarganya, melalui apa jua cara.